



Ils contuorns da l'Hotel Chesa Colani dess gnir fabricheda üna piazza cumünela cun zona d'inscunter (tempo 20).

FOTOS MARTIN CAMICHEL

## «Be la tevla nu güda bger»

Adonta d'un sviamaint – e que daspö il 1986 – vo la glieud auch'adüna pü gugent tres Madulain cun l'auto per river a Zuoz. Ün nouv concept da trafic dess schoglier quist problem, ma quel concept ho già pissero per la prüma critica. Ruet Ratti, president cumünel da Madulain, ho declaro ils müdamaints e las intenziuns a regard il trafic tres cumün.

MARTIN CAMICHEL/FMR

«Reacziuns positivas nu's stu spetter memma bgeras e las negativas vegnan da svessa. Ma scha que ho già pissero per chos cotschens, alura vainsa tuottüna eir già ragiunt ün pô il bôt cha la glieud nu giaro più uschè suvenz tres Madulain», disch Ruet Ratti, president cumünel da Madulain. Per chos cotschens pissera nempe il nouv concept da trafic, cha la suprastanza cumünela da Madulain vaiva introdüt iis 12 october 2022 e que per immediat. Da la politica in generel nu s'es adüso cha telas decisiuns vegnan realisadas dalum, ma l'exaimpel da Madulain muossa cha que po eir ir svelt: Uschë markescha üna strivila da culur daspö duos eivnas üna zona da peduns, e que i's lös pü strets da Madulain. Quella zona cumainza a partir da la punt sur l'ovel d'Es-cha e vo fin zieva l'Hotel Chesa Colani. Sün ün ulterieur tragef a la sortida dal cumün – traunter il camping e las ultimas chesas in direcziun Zuoz – calman daspö l'eivna passeda islas il trafic, uschè ch'un crucher nun es in tscherts lös pü possibel. Bgera glieud d'eira surprisa quaunt svelt e quaunt rigurus cha'l nouv concept da trafic es gnieu introdüt. Ma l'effet giavüscho peral già uossa d'esser avauta maun.

### Der spazi als peduns

Il tragef pü stret a Madulain – da la punt da l'ova d'Es-cha fin zieva l'Hotel Chesa Colani – es que per part difficil da cruscher. Impostü tutists cun autos grands nu sun adüna taunt adüso vi da las vias strettas e que ho adüna darcho do pitschnas collisiuns, eir cun chesas. «Peduns nun haun lo üngün spazi e per cha quels survegnan lo dapü piazza, al vains uossa segno cun üna zona da peduns. In ün seguond pass dess alura gnir realiso ün marchapè da var 4 cm otezza, uschè cha autos vessan listess aucha da pudair cruscher», disch Ruet Ratti. Insemler cun las ulteriuras imsüras saja que schont il grand bôt da render main attractiv dad ir cun l'auto tres Madulain. Il president ho eir manzuno il trafic d'inviern, chaschuno da turists chi vau a Zuoz culs skis. Causa cha la staziun da val principela as rechatta dadour Zuoz, piglia bgera glieud la via tres Madulain. Eir quist problem dess gnir scholt cul nouv concept da trafic.

### Ingrandir la zona da tempo 30

Da nouv as voul eir prolungir la zona da tempo 30 fin ourasom il cumün, a la sortida vers Zuoz. Avaut schmettaiva quella cuort zieva l'Hotel Chesa Colani. «Scha's metta ad ir be ün tevla, alura vain quella pel più ignoreda, be üna tevla nu güda bger», disch il president cumünel. El agiundscha cha quistas imsüras cun quellas islas d'eiran necessarias per survgnir in-

somma il permess per introduer la zona 30 sün quists tragef. «Scha's metta no be üna tevla da tempo 30 e la glieud vo listess 100 km/h, alura disch la pulizia cha quista zona nu fess segn. Dimena vaiva da gnir calmo il trafic», declera Ruet Ratti. Cha quistas imsüras haun pudieu gnir realisadas uschè svelt es, causa cha quistas islas e quistas strivilas sun be provisoricas, uschè il president cumünel.

**La prüma piazza cumünela per Madulain**

«Cun quistas imsüras provisoricas vulainza mussen che chi s'ho l'intenzion da fer. A partir da l'an chi vain vain fabricho il marchapè pü ot e las islas da trafic vegnan eir fabrichadas definitivmaing», declera Ruet Ratti. Tar quistas is-

las es que previs da las cuverner cun erva e da las render pü attractivas. La populaziun ho uossa aucha temp dás parteciper a la discussions e po eir contribuir idjeas e müdamaints. Ün ulterieur novum es l'introduciun d'una zona d'inscunter cun tempo 20. Quella cumainza tar la punt da l'ova d'Es-cha e schmetta zieva il spartavias per ir in direcziun staziun. «Nus vains previs da fabricher üna piazza da cumün in quels contuorns, lo inua ch'a's rechattan hozzind la piazza da giuver e la piazza d'unihockey, güst visavis l'Hotel Chesa Collani. Perche cha Madulain nun ho mê gieu üna piazza cumünela», disch Ruet Ratti. Las imsüras definitivas dessan gnir realisada a partir da la prüma vaira chi vain e que in etappas.



Sül tragef il pü stret es gnida markeda ün zona da peduns.

## ZUOZ

### Vernissascha dal cudesch

#### «Clementina Gilly: Traunter di e not»

Ils 19 november 2022 a las 10:00 ho lö a Zuoz illa seletta da la chesa da scoula la commemoraziun per l'ochauntevel di da mort da la poetessa e publicista zuozingra Clementina Gilly (1858-1942) e la vernissascha dal nouv cudesch «Clementina Gilly: Traunter di e not» da la Chesa Editura Rumantscha.

Clementina Gilly es steda üna vaira piuniera dal muviment rumauntsch. Ella ho per exaimpel pubblico cun sia collezioni da poesies «Fruonzla» dal 1926 il prüm cudesch rumauntsch d'una

duonna il temp modern ed ella es eir steda in sia valleda üna piuniera dal muviment feminist, pretendand cun fervenza üna meglidra pusiziun e scolaizun per mattas e duonnas. «Ma scha nus non pretendains oter cu la pü natürela chosa del mund! A nun haun d'avair üngüna temma, cha vöglians nus la supremazia, nus volains be equited. Ad ais ura cha la duonna possa sortir dal street circul, nel quôl vegls pregüdizis l'hau fin uossa confineda.», Clementina Gilly, 1910

In una nouv edizion, procureda da Rico Valär

in collauraziun cun Annetta Ganzoni ed Edith Prescott, vain preschanteda üna tscherna da poesies, essais e raquints tradüts da Clementina Gilly e cun bgeras fotografias e documaints persuels as survain ün'impreschiun da sia vita e sia personalited. A la vernissascha da quist cudesch preschaintan Rico Valär, Annetta Ganzoni ed Edith Prescott in cuorts referats sia vita e sia ouvrä ed ün'exposiziun da l'Archiv culturel d'Engiadina Ota muossa fotografias ed ogets persunels. (cdm/fmr)

**Ulteriuras preschantazius:** Sanda, ils 5 november 2022, a las 10:15, als Disa da literatura a Domat. In schner 2023 i'l Chesin Manella a Schlarigna tar l'Uniu dals Grischs. Mardi, ils 16 meg 2023, a las 19:30, a la Scoula ota popula da Turich.

## Clementina Gilly



Poesias, essais e raquints

In una nouv edizion vain preschanteda üna tscherna da poesies, essais e raquints tradüts da Clementina Gilly, 1910

FOTO MAD

## SAN MUREZZAN

### Quatter candidats

#### per ils duos sezs i'l parlament

Per ils duos sezs i'l parlament da la vschinauncha da San Murezzan do que quatter candidats, uschè ch'a' suveraun ho la schelta. Que scriva la vschinauncha da San Murezzan in üna comunicaziun.

A disposiziun staun: Gregor Joos (sainza partieu), Leandro Testa (PLD), Gian Andrea Conrad (PPS) e Patric Maisen (PPS). Ils duos sezs vacants sun resulteius zieva cha Gian Marco Tomaschett (PPS) e Christoph Schlatter (sainza partieu) sun gnieus elets illa suprastanza cumünela la fin settember, melgrô ch'els d'eiran già gnieus elets i'l parlament. L'eleciun ho lö ils 27 november. Per il sez illa cumischiu da gestiun nun ho que do üngünas annuncias, uschè cha quell'eleciun vain spusteda e quist post vain scrit oura da nouv. (rt/fmr)

## ACADEMIA ENGIADINA SAMEDAN

### Fadri Guidon dvainta rectur

#### da la scoula media

Fadri Guidon dvainta a partir dals 1. favrer 2023 rectur a la scoula media da l'Academie Engiadina a Samedan. Cunque succéda'l a Thomas Bächer chi banduna la scoula per la fin da schner.

Fadri Guidon lavura daspö passa 25 ans tar l'Academie Engiadina, que scu docent a la scoula spezialiseda superiura da turissem e scu magister per informatica e biologia a la scoula media. Tres sia lungia experienza cugnuoscha il Beverot precis la scoula e sieus bsögns, scrivan ils re-spunsabels in üna comunicaziun.

Sper l'uffizi scu rectur resta Fadri Guidon inavaunt magister a la scoula media, però in ün pensum parziel. Eir a sieu uffizi accessoric scu president cumünel da la vschinauncha da Bever resta el fidaivel. La fin settember d'era Fadri Guidon gnieu reelet scu president cumünel per sia terza perioda d'uffizi. (rtt/fmr)



Fadri Guidon da Bever dvainta a partir dals 1. favrer 2022 rectur da l'Academie Engiadina a Samedan. FOTO MAD